

INUIT ATAQATIGIIT INATSIARTUNI



UKA2023/137/153/154

Ulloq saqqummiivik: 19. okt.23

Pipaluk Lynge

Nummi innuttaasunut immikkut nakorsiartarfeqalerneratigut nakorsiarsinnaaneq oqinnerulersinnaassanersoq pillugu apeqquteqaat aallaavigalugu oqallisissiasatut siunnersuut.

(Atassutip Inatsisartuni ilaasortaatitai)

Qanoq iliornikkut nakorsat namminersortut nakorsiartarfiutitaarnissaminnut aallartisansinnaalernissaat aqutissiuunneqarsinnaanersoq pillugu apeqquteqaat aallaavigalugu oqallisissiasatut siunnersuut.

(Atassutip Inatsisartuni ilaasortaatitai)

Peqqinnissaq pillugu sillimmasersinnaanerup atuutilersinneqarneratigut peqqinnissaqarfitsinnut oqilisaataasinnaanersoq pillugu apeqquteqaat aallaavigalugu oqallisissiasatut siunnersuut.

(Atassutip Inatsisartuni ilaasortaatitai)

Apeqquteqaat aallaavigalugu oqallisissiamut pisariaqartumut qujanaq. Saqqummiussatataatsikkut oqaluserineqartussaammata imaattumik ataatsimut oqaaseqarfigissavavut.

Inuit Ataqatigiinni anguniarparput innuttaasut tamatta peqqinnerulernissarput. Peqqissuuneq paasisarparput timikkut, tarnikkut anersaakkullu inuummarissutsimiittoq.

Siullermik inuttut ataasiakkaatut inuummarinnerunissarput akisussaaffigaarput.

Taamaattoq inuiaqatigiittut pisariaqartitavut aallaavigalugit peqqinnissaqarfimmit pitsaasumik sullinneqarnissarput pisinnaatitaaffiguarparput.

INUIT ATAQATIGIIT INATSIARTUNI



Peqqissuserput inuunitsinnut aalajangiisuvoq, peqqitsillutalu toqqissisimasarpugut. Siunitsinniipput naalackersuinikkut suliassagut aamma maani tamattaalluta pisussaaffigisagut.

Manna iluatsillugu peqqinnissaqarfimmi sulisut tamaasa qutsavigiumavagut, inuit ikiorniarlugit aalajangersimanersi ataqqinaatigaarsi, nunatsinnullu pisuussutaavusi nalitoorujussuit.

Maanna Peqqinnissaq pillugu Ataatsimiititaliarsuup isumaliutissiissutaa tigusimalerparput naalackersuinikkullu iliuuseqarnissarput massakkuuvoq.

Iliuuseqarneq siulleq Naalackersuisut takutippaat isumaqatiginninniarnerni maanna ingerlatsinermikkut. Inuit Ataqtigiiit akisussaaqataagatta peqataassaagut. Pisariaqarpoq peqqinnissaqarfippit inuiaqatigiillumi ataatsimut isiginiarlugit iliuuseqarnissaq- aamma siunissamut ungasinnerusumut inuiaqatigiinni nalornisitsinata peqqinnissaqarfimmi aaqqissuusseqqinnissarput.

Nuummi Dronning Ingridip Peqqissaavia innuttaasut nakorsiartarfigaat. Nuummilu nakorsiartarfiup sulisui innuttaasut amerliartornerannut malinnaasimangillat. Tamannalu ajornartoriummi matumani qitiuvoq. Inuit Ataqtigiiit isumaqarpugut ilorraap tungaanut ingerlasoqassappat sulisut amerlineqarnissaanik suliaqartoqartariaqartoq. Peqqinnissaqarfimmi sulisussaaleqinermut iliuuseqarnissamut naalackersuisut aningaasamut inatsisissamut siunnersuuteqarnerat Inuit Ataqtigiinnit tigulluarparput. Tamannalu piaartumik ukkatarineqarnissaa pisariaqartutut nalilerlugu.

Taamatut oqareerluta Nuna tamakkerlugu nakorsiartarfiit aaqqiissussuvigineqaqqinnissaat aamma isiginiartariaqarparput. Suliassanik ulikkaarpugut aaqqiisutissallu matumani ataasiinnaangillat aamma peqqinnissaqarfimmi ilisimasaqarluartut peqatigalugit timitalersorniagassagut.

Aaqqissuusseqqinnermi peqqinnissaqarfimmi sulisut peqatigeqqissaartariaqarpugut ilisimasaat atugaallu ataqqillugit. Aalajangersaasinnaavugut ulluinnarnili unammilligassat ilisimangikkaagatsigit piviusunngorsinnaaneri killeqalersarput, tamanna pinaveersaartariaqarparput.

INUIT ATAQATIGIIT INATSIARTUNI



Nakorsiartarfiit namminersortunngorsinnaanerit nunatsinni oqaluuserineqarnissaannut apeqquteqaat aallaagigalugu saqqummiunneqarnera soqutiginarpuvoq.

Namminersortutut nakorsiartarfimmi ingerlatsisoqalissappat pitsaassuseq pisariaqartitallu suuneri qulaajarnissaat soqutigaarput, matumani ajoqutaasinnaasut iluaqutaasinnaasullu paasisaqarfiginissaat pisariaqarmat. Inuit Ataqatigiinniit apeqqut manna pillugu immikkut ilisimasalinnik suleqatigiissitaliortoqarsinnaanera isumaliutissaasoraarput.

Nakorsat namminersortut sulilersitsinermi pingarnerpaassaaq nakorsiaq inatsisitigut illersorneqarsinnaasumik katsorsarneqarnissaa.

Assersuutigisinnaavara nakorsanit namminersortunit qanoq journalit inunnut tunngassuteqartut inatsisitigut illersorneqarsinnaasumik pissarsiarineqarsinnaalernissaat suliassaammat. Suliassaq soqutiginarpoq.

Matumanittaaq pingaarnersiuiineq pisariaqarpoq.

Inuit Ataqatigiinni peqqinnissaqarfimmi pingaarnertut iluuseqarfigerusuppagut sulinutit meeqqanut inuusuttunut tunngasut, kræfteqalerlutik napparsimasunut siusissumik suussusersiineq katsorsaanerlu, suliniutit tarnimikkut napparsimasunut katsorsaarnermut tunngasut siusinaartumillu iluuseqarnernissamut suniliutit ilaatigut pingaarnersiuiunitsinniipput.

Saqqummiunneqarportaaq peqqinnissaq pillugu sillimmasersinnaaneq. Innuttaasut amerlanerusut sillimmaserneqarnissaat kissaatigaarput. Matumani suliffeqarfiit pisortat pigisaat sulisuminnut tunngatillugu sillimmaasiisinnaanerit soqutiginaateqartut ilagaat, amerlanerilli suli sillimmasernissaminnut periarfissamik periarfissaqannginnerat isiginiarneqartariaqarpoq.

Isiginiagassaraagut sumiiffeqarmat suliffissuaqarfiunngitsunik kiisalu killilimmik suliffeqarfiusunik. Nunatsinnimi aningaasanik killilimmik isertsitaqartut nammineerlutik sillimmasernissaminnut akissaqanngitsunik ilaqarpugut.

Taama oqaaseqarluta apeqquteqaat aallaavigalugu oqallissisiamut Inuit Ataqatigiinniit oqaaseqarpugut qujavugullu oqalliseqataasinnaagatta.